

# **PAULO' TIMOTEO'NI GIZE-DINE' LUHUVO NITE' NABA 1**

Paulo' Timoteo'nimu' Luhuvo Nite' Seta' Gize-dingumu' Gomu' Gataa' Gamazi

Mene luhuvo nite' seta' nene aposolo' Paulo' gizine' ve. A'mine Paulo' monovo'vemu' nene Aposolo' bukuu' nene gatelesane. Ido' Izesu' Kilisito' evenele zuho Loma ebeku' minani' neti luhuvo nite' Paulo' gize-ngidingumu' gomu' gataa' gamazi gizuningukisi nene ei' Paulo' monovo'vemu' nene ma gatelesane. Ido' Paulo' luhuvo nite' seta' mene gizine' nene ei' hize ele' o-daa' ive Timoteo'ni nene gize-dine' ve.

Timoteo' nene Loma vete gizebo anii' polovinsi Asia ve langu' Lisitila tauniuti' ve minine'. Timoteo' meleho nene Izesu' evenele minamive nGiliki veuti' minine'za izeleho nene Zuda vene' minine' ve. Timoteo' aza izipe ngomolo' ha neivo izelehosi ido' eleni izelehosi ingine mono' godolo litehe'mo lokine' gamazi muki' nene apizi imasine'. Lisitila ebekuko Paulo' aza gana' api' ogo vo Izesu' gamazi've lamine' evene' lo-ngimine' gameneu' nene Timoteoki izelehoi ingine Izesu' evenele zuho lili' asine' noloseive. Paulo' aza Lisitila ebeku' gohi vo ningengedo tine' molo volosa ingu' nene ei' hize ele' i-daa' aveuti' ve minelive lo Timoteo'ni ele'mizo vine'. A'minemu' nene Aposolo 16 neu' nene gatelesane. Nelotii' Timoteo' aza Paulokisi maka' mono' Izesu' gamazi've lamine' evene' lo-

ngemaa' gono'veu' nene hize ele' o-dine!. Ido' Paulo' aza luhuvo nite' linge ma hulingu' nene Timoteokisi nohululsive lo gizine!. Ado' Tosalonika aleveliti luhuvo nite' naba vanu naba tu neukisi ido' Kolidi aleveti luhuvo nite' naba tu neukisi ido' Hilipi aleveti luhuvo nitekukisi ido' Kolosa aleveti luhuvo nitekukisi ido' Hilemoni'ni luhuvo nitekukisi nene Timoteokisi nohululsive lo gizine! ve. Ido' Paulo' aza Izesu' evenele zuho Loma ebeku' minani' luhuvo gize-ngidine' lumola nene Timoteo' aza a'mine alevemu' ngopo'ni line!. Hebilao' aleve luhuvo nite' gizo hulo-ngidive ne'mo a'mine luhuvo nite've ne'mi lumula nene ti' lo lo neive: Timoteo'ni nene nala' numungu' mininguti' imisele hilikeve. Ne'mine line' nenako nemu' nene laza ti' lo gele none: Timoteo' aza Izesu' gamazi've lamine' lo soto' oga' ingumu' nala' numungu' huli-dikevo minine' ve lo gele none. Ido' ne'mine i-dani' nene gamene hamo' i-dave lo gele none'za gohi ne'mine i-dahe i-damahe nemu' ma gelamune. Loma vete Paulo'ni bili hilikevo neloti' alinge' Timoteo' aza nadi' ogo minihe nemu' mono' godolou' ma gizi li-limamave. Gizi li-limamaha gozopo' aka'milati' li'mi ani' gamazi ma ti' lo neine' ma neive: Timoteo' aza Eheso ebeku' mino Izesu' evenele zuho a'mida minani' nene gizebo o-ngedo neivo kilisimasi muki' ogo vavo alinge' nene Loma veti gizebo ve naba gulive Domitianii' aza Izesu' evenele zuho nene do osu' lo-ngedelesa goboni molo-ngedaa' ine' gameneu' nene ei' Timoteo'nisi bili hilani' ve lani'.

Luka' aza aposolo' buku gize osu' line' gamenela nene Paulo' aza Loma ebeku' nala'

numungu' kilisimasi sita' mino neloti' alinge'  
 nesi ha minine'. Ne neine'za gozopo' aka'milati'  
 li'mi ani' gamazi ma ti' lo neine' ma neive: Nala'  
 numunguti' huli heta i-dani'za gohi mono Izesu'  
 gamazi've lamine' nene evene' lo-ngemo mo  
 hota gehepeve minine' misubo Sipeni nelasi vo  
 lo-ngimine' ve. Neloti' gamene ha'na minamivo  
 Loma ve nete nala' numungu' gohi di huli-  
 dani'. Ne'mine igi goni' i-di luvono giti hulan'i'.  
 Ne'mine li li'mi ani' gamazi nene evene' muki'  
 mo lamineto' neive li gili ele'vole' iga' nave.  
 Mono' godolou' minine' gamazi'mi monovo  
 gilaa' ave muki' nene ti' li gilaa' nave. Paulo' aza  
 Timoteo'ni luhuvo nite' naba vanu gize-didoti'  
 nene gamene ha'na ogo vamivo Loma vete nala'  
 numungu' huli-dikevo gamene seta' ine' ve li  
 gilaa' nave. Ido' ti' li gilaa' nave: Ido' a'mine  
 nala' numungu' mino Timoteo'ni luhuvo nite'  
 naba tu gize-didoti' nene gamene ha'na ogo  
 vamivo Loma ve nete bili hilani' ve li gilaa' nave.

Ido' Paulo' aza Timoteo'ni luhuvo nite've  
 naba vanu gize-dine' gamenela nene Timoteo'  
 aza Eheso ebeku' mino Izesu' evenele zuho  
 a'mingu' minanii' nene gizebo o-ngedo minine'  
 ve. Paulo' aza Timoteo' Eheso ebekuko neida  
 nene mo alosuvoni'za geto ma amoloni' nene  
 mono' muliseu' igi mili minilizani' monovomu'  
 nene gele mineline lo luhuvo nite' mene nogize-  
 giduve lo Timoteo'ni gize-dine'. A'mine luhuvo  
 nite' nene evene' malite soza mono' laa' nani'  
 nene do'mo lemeline' monovomu' nene lo-  
 imine'. Ado' vene' daa' velo' vaa' nene ami  
 mini noso' nite' mamu' malise ilizave li laa' ani'  
 gamazi do'mo lemeline' monovomu' nene lo-

imine!. Ido' vemoho' mono' muliseu' O'mosola  
lilizani' nadi lilizahe ido' vene' nene oko'nido'  
inite' di guni izilizani' monovomu' lo-emo vene'  
ingine vemoholiti gizebo ve'ine lili' amilizave lo  
lo-imine!. Ido' mono' muliselo' gizebo ilingumu'  
nani'mine ve di oti-dilizahe nemukisi lo-dine'.  
Ido' Kilisito' gonou' ve lamine' minelingumu'  
ogo molo iline' monovomukisi lo-imine!. Ido'  
a'mida Izesu' evenele zuho nizani' nete ei' Tim-  
oteo' ogo molo ilidotikisi ido' gamazi lilidotik-  
isi monovo lamine' ningi dalizangumu' nene  
lo-imine!. Ado' lulo evene' ngemo nasahili'  
o-ngedovo' minilive ido' gele ele'vole've nene  
minivo lihime monovolot'i mine olovo' ilive lo  
lo-imine!. Ido' ei' gizebo'veu' minave nene  
mono' godolouti' gamazi gato lo-ngemo mono'  
apize ngemaa' monovo nene hulamo gamene  
gamene o-ngedelive lo lo-imine!. Ido' evene' ato  
ato' ado' vene' nizahe vemoho' nizahe ozoho  
nizahe ei' gidini goso've nizahe nene ei' o-  
ngemeline' monovomu' lo-imine!. Ido' vene'  
gevono' minanguti' mala nene mono' mulise'mo  
mine lamine' ilizangumu' nene hize ele' o-  
ngedo ido' mala nene hize ele' o-ngedamilive  
lo ize' molo-ngedaa' iline' monovomu' lo-imine'.  
Mono' muliselo' gizebo ve meni ngimilizani'  
monovomu' lo-dine!. Gonou' ve ingine gizebo  
ve'ine nene gono di lamine' igi di-ngidilizave.  
Ido' a'mine gizebo ve'ine Izesu' evenele zuho  
nizavo ma nene gono di lamine' i-ngidilizani'  
nene inite' naba neive line!. Ido' heneni ve  
ingine engi' oko'ine di dizami asi mulu'ningu'  
geni amivo mini ingine di minani' initekuti' nene  
evene' masi hize ele' i-ngidilizave lo lo-ngemelive

line!. Ido! O'moso'mi monovomu' gamazi suno' o neine' nene la'lisetevu' gele none li laa' avete a'minemu' amuzo mili gihile've nomine' getipe gamazi laa' nangu' nene Timoteo' vo lamilive lo gohi lo gala ogo luhuovo nite've no'noho' gamazitunu' gize osu' line!.

Paulo' aza Timoteo'ni luhuovo nite've naba tu gize-dine' nene Loma ebeku' nala' numungu' mino lasi goni've gililizangumu' gizebo ogo mino a'mine luhuovo nite' nene gize-dine' ve. A'mine luhuovo niteku' nene Timoteo'ni gala do ti' lo line!: Gaza Izusu' gamazi've lamine' do mineliningumu' goboni mili-gidi minilisaha ne'mine ilizangukisi nene hulamo ha do gili' lo do minezo lo lo-dine!. Ido! a'mine apize ngimuvoni' gamazi nene evene' ma apize ngemanivo inginesi evene' gohi ma vi apize ngimilizave lo lo-imine!. Ne'mine gono amuzo molo dalive lo lo-imine!. Ne'mine lo aza Izusu' gamazi've lamine' lo-ngemaa' inguti' gamazi linge ma naba miningumu' nene gohi lo gala ine!. Ne'mine lo ido! a'mine Izusu' gamazi've lamine' nene evene' lo-ngimingumu' nala' numungu' huli-dikevo minine' monovomukisi lo-imine!. O'moso'mo ei' ve lo do kegesekine' evenele nene lukuvo nalizave losa a'mine mulumo geniu' nene nouve lo line!. Ido! a'mine line' inite' mukikumu' nene Izusu' evenele zuho lo ga'ine ilive lo Paulo' Timoteo'ni lo-emo ido! mono gamazili'mi monovomu' lolize gamazi lamilizave lo lo-ngedelive line!. Ne'mine lolize gamazi golosou' nene Timoteokisi aza lamilive lo lo-dine!. Inite' goloso daato' nene mine olovo' o mino monovo lisihekovo' ogo

gele ele'volekovo' ogo mino lulo evene' ngemo hongu nasahiliku' minelive lo lo-dine!. Ido' Timoteo<sup>1</sup>ni hungo' emo ti' lo line!: Ge'nebe gamene goloso ado' Izesu' gamazi've lamine! lilizado' gili dalisa gilami monovo goloso ato atoto' nene e'metilizani' gamene ma aloseive line!. Asi've Paulo' oga' ine' ne'mine ogo Izesu' gamazi've lamine! lo soto' oga' gono've nene amuzo molo dozo lo-dine!.

Ne'mine lo nibili hililizani' gamene nene mo avito' ogave lo lo-emo ido' hize ele' i-nidaa' ave linge muki' nene huli-nidi ebe' ato atota vikevo Lukakisivo' mela nosive lo lo-emo ido' gonito' otuvodokisi nene evene' hamolitesi neni' gamazi'nelo' hize ele' i-nidamavo minuvoni' ve. Nemu' gaza geto ano lo lo-dine!. Ne'mine lo O'moso'mo hize ele' o-dingumu' nene opo'ni lo a'mida soto' ine' inite' linge mamu' lo-emo Timoteo<sup>1</sup>nisi evene' linge mamukisi mese' aseka longedo luhuvo nite've nene no'noho' gamazitunu' gize osu' line!.

*Paulo' Luhuvo Nite' Apizo Giza'a' Gamazi Gi-zosa Timoteo<sup>1</sup>ni No'noho' Gamazi Gize-dine'*

<sup>1</sup> Do lu' izaa' ive O'mososi ido' lele'mize lamine' ilive ne neive lo gele medele minaa' unive Izesu' Kilisitokisi engi' nene Izesu' Kilisito' aposolo lolo' iline li lasido' lolo' uve nenii' Paulo' luhuvo nite' meve nene <sup>2</sup> gaza monoku' nenii' gipe'ne gihile lolo' ogo minanive gei' Timoteo<sup>1</sup>ni nene nogize-giduve. Ne'mine ogosa meteho O'mosolati' ido' Guvetesi ve Izesu' Kilisitodati' nasahilikisi ido' mulumote ningaa' monovosi ido'

hongu lo lamino minaa' monovo nesi nene lehizi-gidikesivo geito' minivoo losa noluve.

*Evene' Soza Saza Gamazi Apizi nGimaa' Nani'  
Nene Alamilizangumu' Lo-ngedelive Lo Paulo'  
Timoteo'ni Lo-imine' Gamazi*

<sup>3</sup> Naza gomu' Makedonia misubouko volosa noogo ti' lo lo-gimuvoni' malo' nene e'meto ozo: Ado' Eheso numuno ebeku' hazavo' mino evene' malite mono' atoli'mine ma apizi evene' li-ngimaa' nani' nene o've lo-ngedosa <sup>4</sup> avo'ningine di naba i-ngidi gulive'ine lika' lika' igi laa' nani' gamazi ado' ngeli li pili osu' lamilizado' o minine' gamazi nehe ido' gihile've nomine' gamazi ga'ninguti' gili lani' gamazi nehe ne'mine gamazimu' nene ga'ine gilivi' gilivi' amilizaze. Lo-ngedezo. A'mine gilivi' gilivi' igi minaa' naani' gamazi'mi monovomu' vise' igi gohi li volelo' melo' ika' ika' avo ne'mo nene madu'ine do lihitehe' o-ngedosa a'mine gamazi ne'mo O'moso'mo lulou' gele neine' akalo' nene ma ngele'mize molosa'mive. Asi O'mosolo' gele medele minaa' ne'movo' nene a'mine akalo' lele'mize molaa' neive. <sup>5</sup> Ido' gaza ne'mine lo-ngedeline noluvoni' nene ingine a'mido' e'metisa lu'ningu' goloso monovosi nomivo mini ga'ningu' engi' monovo'inemu' ize' mili gilikevo laminekovo' minaa' ive mini apa nite' ami O'mosomu' gili ele'vole' gehepeve igi minilizadi'movo' lu'ine ngemaa' monovo nene engita soto' ogo minelive losa luvoni' ve. <sup>6</sup> Ne'mine ilizangumu' nene noluvoni'za evene' linge ma nene mo a'mine aka lamine' nene huli zovo' izisa gihile've nomine' gamazivo' li

volelo' melo' iga' nave. <sup>7</sup> Ingiine nene O'moso'mi lou' gamazi apizi ngimaa' ave lili' ilisa gilani'za ingine a'minemuu' laa' naani' gamazi'mi monovo nesi ido' a'mine livi' kiselivi' igi lani' initeliti monovo nesi nene mo ma gili hehe lisa'mave.

<sup>8</sup> O'moso'mi lou' gamazi nene laza ladeni amo gono'velo' gehepeve do molo olone' nene mo inite' lamine' gehepeve mineleseive. <sup>9</sup> Ee, a'mine lou' gamazi neve nene evene' lisihe' i minavemu' nomive. Asi evene' ma lou' gamazilo' e'metamaa' ave gizengizelo' ve nizahe ido' O'mosomu' ngehelele izamaa' ive lihimelo' ve nizahe nemukisi ido' monovo lisihe' lamineto' e'metami mono'ine nomine' minave nizahe ido' me'ningine ize'ningine ngibili hilaa' ido' evene' ngibili hulaa' ave nizahe nemukisi ido' <sup>10</sup> vene' vemoho' gipe alu gopo ingi'mi monaa' ave nizahe vene' vemoho' ingaa' ani' avazahalo' e'meti ingami vene' angise'ine ingaa' avo vemoho' angise'ine ingavo iga' ave nizahe nemukisi ido' evene' gumine di halekiki moni daa' ave nizahe ido' sozalo' ve nizahe ido' soza gamazimu' lamine' nolune li a'ine dizaa' ave nizahe nemukisi ido' monovo gohi evene' ngele'mize lamine' iline' monoto' vo damaa' ine' malo' e'metaa' ave nizahe ne'mine alevemu' nene lou' gamazi ne neive lo gele minosa O'moso'mi lou' gamazi nene gono'velo' gehepeve do molo olone' nene a'mine lou' nene inite' lamine' gehepeve mineleseive. <sup>11</sup> A'mine ne'mine noluvoni' gamazi mene lamineku' minive O'mosolati' guvelesi gamazi lamineto' nene vo milise' o neive. A'mine nene O'moso'mo lo soto soto' ogo lo-ngemeline lo lehize-nede neine' gamazi lamine' mamu' nene

noluve.

*Izesu' Kilisito' Aza Paulo' Ve Goloso Mininguti'  
Ele'mize Lamine' Ogo Ei' Gonolo' Ve Lolo' O-dingumu'  
Opo'ni Line' Gamazi*

12-13 A'mine gono dalongumu<sup>1</sup> amuzo nimive Guvetesi ve Izesu<sup>1</sup> Kilisito<sup>1</sup>'nimu<sup>1</sup> nene isaa<sup>1</sup> neve lo opo<sup>1</sup>'ni noluve. Ee, naza gomu<sup>1</sup> eze nene dovo ledevo<sup>1</sup> ogo mino evenele goboni molo-ngedo do goloso o-ngedaa<sup>1</sup> uvoni<sup>1</sup>'za naza eze monovo gele guno amuvodi<sup>1</sup>'mo ezemu<sup>1</sup> gele ele<sup>1</sup>'vole<sup>1</sup> amo ne<sup>1</sup>'mine oga<sup>1</sup> uvonako nemu<sup>1</sup> nene ise<sup>1</sup>'ne izosa nenikumu<sup>1</sup> a'mine gono<sup>1</sup>'ve nene ha dalido<sup>1</sup> o neive lo gele medele mino a'mine gonolo<sup>1</sup> nene nele<sup>1</sup>mize molaave. <sup>14</sup> Ne<sup>1</sup>'mine o-nedoo Guvetesi ve aza vauve goloso elo nasahili<sup>1</sup> o-nedosa naza ei<sup>1</sup> Izesu<sup>1</sup> Kilisito<sup>1</sup>'nimu<sup>1</sup> gele ele<sup>1</sup>'vole<sup>1</sup> o mino lu<sup>1</sup>'ne emelodo<sup>1</sup> nele<sup>1</sup>mize molangumu<sup>1</sup> nene opo<sup>1</sup>'ni lo isaa<sup>1</sup> neve noluve. <sup>15</sup> Ee, Izesu<sup>1</sup> Kilisito<sup>1</sup> aza lihimelo<sup>1</sup> ve do ngu<sup>1</sup> izelove lo me misubou<sup>1</sup> limive gamazi nene mo gihile lamine<sup>1</sup> neive. Evene<sup>1</sup> muki<sup>1</sup> a'minemu<sup>1</sup> gele mu<sup>1</sup>'musi<sup>1</sup> o minelonido<sup>1</sup> nene lisihe<sup>1</sup> o neive. Ido<sup>1</sup> lihimelo<sup>1</sup> ve engikuti<sup>1</sup> nen<sup>1</sup>i neve nene lihimelo<sup>1</sup> ve naba minuve ne nouve. <sup>16</sup> Nouvon<sup>1</sup>'za Izesu<sup>1</sup> Kilisito<sup>1</sup> ise<sup>1</sup>'ne izine<sup>1</sup> nene aza mo mulumote gelo geto lihime lemamo isete ize<sup>1</sup>'mo ogo minaa<sup>1</sup> neine<sup>1</sup> monovo<sup>1</sup>'ve nene nenito<sup>1</sup> gana<sup>1</sup> do soto<sup>1</sup> ogo ngeleebizavo alinge<sup>1</sup> ezemu<sup>1</sup> gili ele<sup>1</sup>'vole<sup>1</sup> igisa minevo<sup>1</sup> minevo<sup>1</sup> nge-meni dameni dalizave ningilizangumu<sup>1</sup> nene a'mine monovo<sup>1</sup>'ve<sup>1</sup>mi avazaha pikisa ne<sup>1</sup>'mine nen<sup>1</sup>i nene minelongumu<sup>1</sup> ve losa ise<sup>1</sup>'ne izine<sup>1</sup> ma neive. <sup>17</sup> Ogo voka<sup>1</sup> voka<sup>1</sup> iline<sup>1</sup> gamene mukito<sup>1</sup> Guvelesi ve naba minive helamaa<sup>1</sup> ive ado<sup>1</sup>

evenelite ha ningelonido' amive O'moso hamo'  
minive nene do hozi lo opo'ni lo minevo' minevo'  
ogo minelone' nene oku' lamilihoo. Ne'mine  
ilihoo.

*Timoteo' Mono' Gono Dalingu' Ogo Molo Iline'  
Monovomu' Paulo' Gala Dani' Gamazi*

<sup>18</sup> Gipe'ne Timoteoo, a'mine gono gamazi mene  
nolo-giduvoni' nene gei' monovoka do soto'  
ogo O'moso'mi veleti' gamazi ma gozopo' soto'  
ine' mamu' nene gele mino nolo-giduve. Ido'  
gaza a'mine gamazilo' mene noe'meto monoli'mi  
lovo lamineku' nene lovo hizeline losa nolo-  
giduze. <sup>19</sup> Ne'mine ogo mono' gihilemu' nene  
gele ele'vole' o mino madungau' nene monovo  
lisuhe' lamine' neive lo gele nanido' gehepeve  
e'meto mineline losa nene nolo-giduve. Mono'  
aleve linga ma nete monovo goloso neive li gi-  
laa' nani' madu'ine nene gili hulii mono' engito'  
minine' nene di gopo igisa mo goloso akalo'  
nivave. <sup>20</sup> A'mine aleve engikutii' nene Himenai'o'  
ve Alekisadelo' ve engi' nene nizasive. A'mine  
ve sita' nene naza O'moso divi ledivi' iga' asine'  
nene ningi gilisa gohi ne'mine amilisingumu'  
nene ningi gililisive losa do hulo heta o-ngedo  
Satani'mi anau' molo-ngedekuve.

## 2

*Mono' Muliseu' O'mosola Laa' Ilizangumu'  
Paulo' Timoteo'ni Lo-dine' Gamazi*

<sup>1</sup> Ido' naza gamazi gaka do lolongu' mene  
gana' neve nene ti' lo nolo-gimuve: Lingine  
nene O'mosolavo' laa' ilo. Ido' lengita inite'  
ma vise' igi ma nemukisi nene O'mosola laa'

ilo. Ido' evene' ato ato' muki' nene hize ele' o-ngedelive li O'mosola laa' ilo. Ne'mine ilizangu' nene isaa' neve li-di opo'ni laa' ilo. <sup>2</sup> Ee, laza monoku' minine' monovolo' e'mete osu' lo O'mososi evenekisi monovo lisihekovo' o-ngedo mino goboni mili-lidamavo hongu lo laminovo' mineloningumu' nene guve'nesi ve nabamukisi ido' gizebo i-lidaa' gono daa' ave mukiku-mukisi nene O'moso'mo hize ele' o-ngedelive lo ezela laa' alone. <sup>3</sup> Ne'mine oga' alone' nene do lu' izaa' ive O'moso'mo ningivo lamine' ogavo mulunou' lamine' oloseive. <sup>4</sup> Aza nene evene' muki' lukuvo nalizaho ido' mono' gamazi gi-hile nene go'zi vai' lilizaho losavo' gele minaa' neive. <sup>5</sup> Naza O'moso'mo evene' mukikumu' lukuvo nalizaho lo gala gele minaa' neingumu' O'mosola a'mine alevemu' laa' ilizave noluvoni' nene O'moso ne mo hamokovo' neivosa ido' O'mososi evenekisi goholuso' mino kuku hololedo do hamo' o-ledaa' ive nesi nene hamokovo' neivosa noluve. A'mine kuku holo-ledaa' ive nene evene' minive Izesu' Kilisito' <sup>6</sup> ado' evene' muki' kuluhize-ledelingumu' meni've ei' oko'no hulo hilive nemu' nene noluve. Ne'mine ine' nene O'moso'mo evene' muki' lukuvo nalizahoo lo gala gele minine' nene gamene'velo' lisihe' ogo lelebizavo mo ningo gele none. <sup>7</sup> A'mine gamazi nene lo soto soto' ilinive aposolo lolo' iline lo O'moso'mo nele'mize molani' ve. Naza ne'mine noluvoni' nene mo sozasi lamuvoni'za mo lamineto' gehepeve noluve. Aza nene evene' heta ato' ve gamazi gihile lamine' apize ngeme' ngeme' oga' anive lolo' ogo nanivo ingine gili ele'vole' ilizave losa nele'mize molani' ve.

*Mono' Mulise Milalizangu' Vemohokisi Venekisi E'metilizani' Monovomu' Timoteo'ni Lo-dine' Gamazi*

<sup>8</sup> Nemu' nene mono' mulise numudo' namado' mini'mi monangu' vemo'ho' ingine O'mosola nene laa' ilizave losa noluve. A'mine O'mosola lilisa a'ine di hozi lilizani' nene lihime'ine nomine' mini ngizebolo' nomivo engiku' lovo lolize ne'minesi nomivo minisa nene O'mosola lili'save. <sup>9</sup> Ido' a'mine'mine ogo venelite e'metilizani' monovomu' lo-gemelove: Vene' neve nene evenelite ma ningilizahe ningamilizahe li madu'ine zopovo nalava izi di ma'mine ma'mine igi oko'nido' nite' meni've dizo minine' inite' ngilisa gonolise inite' ato ato' meni've dizo minine' ngalulu' nehe ngolidunu' lili' ani' inite' nehe nevo'mine inite' ngilami ha evene' do upuho' o-ngedamiline' inite' laminekovo' ngilaa' ilizani' nene lamine' ve. <sup>10</sup> Ado' O'moso opo'ni laa' noune laa' ani' venelite igi mili ilizado' lisihe' o minine' monovo lamineto' e'meti igi mili minilizani' ne'mo neve nene engi' oko'nido' gonolise ne'mine nene mineleseive. <sup>11</sup> Vene' neve nene gelekele' gehepeve igi mini elese' iki mini gamazi nene di madu'ningu' milika' milika' igivo' minaa' ilizave. <sup>12</sup> Vene' neve nene vemo'ho' gamazi apize ngemaa' nehe vemo'ho' ngivile' o mino gizebo o-ngedaa' nehe ne'mine ilizangumu' nene gele ngemamo o'ove noluze. Vene' ingine elese' ikiivo' minilizave. <sup>13</sup> Nene Nanitekumu' ve. O'moso'mo gana' nene Eva'ni lolo' amo Adamu'ni nene gomu' lolo' ine' ve. <sup>14</sup> Ido' Satani'mo za gihilemu' golo izavo gele ladeni ive

nene Adamu' nevoba asi Eva' gele ladeni ogosa Satani'mi gamazilo' gele do O'moso'mo line' gamazi avuto' ine' ve. Nemu' vene' neve nene vemoho' ngivile' ami elese' igivo' minilizave losa noluve. <sup>15</sup> Ne neiha vene' ingine Guvelesi vemu' gele mu'musi' i mini lu'ine ngemaa' monovolo' e'meti mini ido' lihime monovomu' olovo' i mini vene' lamine' gehepeve gili mini nizavo izipe gidaa' ilizangu' nene lukuvo ngemeleseive.

### 3

*Mono' Gizebo Ve Lili' Ilizado' Lisihe' I Minilizaveti Monovomu' Timoteo'ni Lo-dine' Gamazi*

<sup>1</sup> Ve ma aza gizebo ve lolo' olosa ive nene mo gono gihile lamine' malo' nene lulo nomolave li evenelite laa' nani' nene mo lamine' laa' nave. <sup>2</sup> A'mine gono nene gono lamine' nenako a'mine gizebo ve lolo' ilive nene eveneliti ve'nido' nene monovo goloso'vesi minamaa' ilive minoo vene' hamo' do minive mino getipe ve minamo monovo goloso ogalove lo monovo'velo' gizebo ogo inite' ogo molo iline' nene mo lisihekovo' ilive mino venenga ve ngele'mize lamine' oga' ive mino evene' gamazi apize ngemaa' ilido' o minelive mineleseive. <sup>3</sup> Noso geli geli ogo naa' ive minamilive. Ido' evenekumu' izebolo' mala' mala' oga' ive minamo asi hongu lo-ngemo lamine' minaa' ive lovo lolize amaa' ilive minelive. Ido' a'mine mono' muliselo' gizebo o-ngedaa' ilive nene monimu' lulo molaa' ilive minamilive. <sup>4</sup> A'mine ve nene ei' vene' izipahala zuholo' gizebo lamine'

ogo ngele'mize akalo' ogal' neivo a'mine izipahala ingine me'nibinemu' gilavo dizavosa peleseve' izami gamazi'velo' gili daa' ave mine-live. <sup>5</sup> Ne'mine noluvoni' nene eze zuho gizebo ogo ngele'mize akalo' o-ngedaa' monovo gele vevesamiiine' nene O'moso'mi muliselo' gizebo oga' gono dalido' nene ngelo lisihe' o minelihe. Mo keke' lisihe' o minamoloseinako nemu' nene noluve. <sup>6</sup> A'mine mono' muliselo' gizebo ve nene monoku' olihe lodiive amive evene' gosoho' ne'mine ele'mizi milalizani' nene ne'mine i-nidikeve loo oko'no do dizavo O'moso'mo Satani lihime molo-do mulumo gono emelesa neine' ne'mine ogo lihime molo-do mulumo gono emaalinako olihe monoku' lodiive amive evene' gosoho' nene mono' gizebo ve lili' i-damilizave. <sup>7</sup> Ido' Izesu' evenele minamave nete ezemu' gamangi mili-daa' avevo' nene mono' gizebo ve lili' i-dilizave. Mono' gizebo ve nene ne'mine ve minamiline' nene evene' malite monovo goloso ogave li elemikevo Satani'mo emengu' molo ivile' ogavo lihime daalive losa noluve.

*Mono' Muliselo' Medeli Mini Ato Ato' Gonolo'  
Gizebo Ve Lili' Ilizado' I Minilizaveti Monovomu'  
Timoteo<sup>ni</sup> Lo-dine' Gamazi*

<sup>8</sup> Ido' mono' muliselo' medeli mini ato ato' gono ado' goho' gahali' nasahili' i-ngidaa' gono nevo'mido' gizebo ve nete nene a'mine'mine igi mono' muliselo' gizebo ve ne'minisa mini evenelite gamangi mili-ngidilizado' i minave mini evene' go'ine izaal' ave minami noso geli geli igi naa' ave minami monovo goloso igi moni heneni vai' dalisa gilaa' ave minami <sup>9</sup> monoli'mi suno' gamazi O'moso'mo do soto' o-lede neine'

nene di mini mono' gili nizado' nene ha e'metivo'  
 minisa engi' lu'ningu' monovo goloso minivo  
 ningisa'mave minilizave. <sup>10</sup> Ido' a'mine ato  
 ato' gonolo' gizebo ve lili' i-ngidilizave nene  
 gomu' engi' monovomu' ize' mili-ngidi ningavo  
 engita a'mine e'metamilizave luvoni' initekuti'  
 nene ma nomivo minilizanikovo' nene a'mine  
 gonolo' dalizangumu' di oti-ngidilizave. <sup>11</sup> Ido'  
 engikisi bizi minani' vene' neve nene evenelite  
 gamangi mili-ngidilizado' lisihe' i minani' vene'  
 minii divi ledivi' gamazi li-ngidisaman' mani' vene'  
 mini negi hizami monovo'nido' gizebo lamine'  
 igi mini ne'mine mana'mine gono dalizani' nene  
 monovo lisihetokovo' e'metisa di minilizani'  
 vene' minilizave. <sup>12</sup> Ido' a'mine ato ato' gonolo'  
 gizebo ve lili' i-ngidilizave nene vene' hamo' di  
 minisa engi' izipaha'nidokisi engi' numu'ningu'  
 ingaa' avelokisi nene gizebo lamine' i-ngidi  
 ngele'mize akalo' iga' ave minilizave. <sup>13</sup> Ne'mine  
 noluvoni' nene nanitekumu' ve. A'mine gono'ine  
 nene laminisa ma di minilizani' nene evene'  
 gilavo dizi minisa Izusu' Kilisitodo' gi'mizo mino  
 gelaa' noune' monokumu' nene ngehelele iza-  
 mivo livi kiselivi' ilisanako nemu' nene noluve.

*Gamazi Mene Gizuvoni' Nene Naza Geto Ma  
 Naamolongumu' O'moso'mi Evenele Zuh Igi Mili  
 Ilizani' Monovomu' Gele Mineline Losa Gamazi  
 Mene Nogizuve Lo Lo-imine' Gamazi*

<sup>14-15</sup> Naza gei' nanida nene lite' lo alohe lo  
 gele nouha lite' lo amuvo ma nene gaza ladani  
 amo O'moso'mi evenele zuhouti' alevelite igi mili  
 ilizani' monovomu' nene gaza gele mineline losa  
 gamazi mene nogize-giduve. A'mine O'moso'mi

evenele zuhomu' luvoni' nene minevo' minevo'  
 oga' neine' O'mosola gi'mizunive leli' mulisemu'  
 nene luve. Langise ne'mo numuno hize ele'  
 ogo do minaa' neine' ne'mino gamazi gihile hize  
 ele' ogo do minaa' neine' nene leli' O'moso'mi  
 evenele mulise neve nene none. <sup>16</sup> Ido' suno'  
 gamazi leli' monoteu' soto' ogo minine' nene  
 gamazi naba neive lo lo soto' oga' noune' nene  
 ado'  
 Kilisito' ei' nene leli' okode ne'mine do otuho  
 soto' ogo minavoo  
 ei' monovo've nene mo lisihe' o neive lo  
 Sikalahuli'mo do soto' ogo lelebizavosa  
 angelo' ma netesi nene ningikevo  
 evene' zuho ato atotidasi gamazi've nene li soto'  
 igi li-ngimikevo  
 me misubouko aleve linge netesi nene ezemu' gili  
 ele'vole' ani' ve.  
 Ido' eze nene O'moso'mo Okulumo' ebe'  
 laminekuko ele'mizo dizine' ve.

## 4

*Evene' Mono' Gihile Hulisa Sikalahu' Golosolati' Mono' Gamazi Gili' Gosoho' Nasaha' Gamazi Apizi nGimilizangumu' Timoteo'ni Paulo' Hungo' Molo Lo-imine' Gamazi*

<sup>1</sup> Ne neisha O'moso'mi Sikalahu' ne'mo ti' lo  
 lo soto' ogo lo-leme neine' ma neive: Alinge'  
 nela nene evene' ma ingine mono' gihile di  
 mini minilizanguti' nene hulisa go'ine izaa' nani'  
 sikalahuta nene vi gi'mizi sikalahu' golosolati'  
 minine' mono' gamazi apizi ngimaa' naado' nene  
 e'metilisave. <sup>2</sup> Ne'mine mono' goloso di soto'  
 nave nete oko'ine losuvoloti' nene evene' lamine'  
 gili minii sozalo' ve monovo goloso lamine' ize'

mili ningi di kegesaa' ani' madu'ine di goloso ikeni' mini<sup>3</sup> vene' daa' velo' vaa' nene amilizave li ido' O'moso ezemu' gili ele'vole' igi gamazi gihile gili minave O'moso'mo ei' isaa' neve li-di di nalizave lo noso' nite' do soto' ine' linge ma nene malise ilizave li-ngidaa' nave. <sup>4</sup> Ido' naza O'moso isaa' neve li-di dalizave noluvoni' nene O'moso'mo do soto' ine' inite' mata' nene laminekovo' neine' nenako a'mine mukikumu' nene O'moso isaa' neve lo-dosa hamokumukisi nene o'ove lamo mo daakovo' olone' o neine' nenako nemu' nene luve. <sup>5</sup> Ido' naza di naakovo' ilisave noluvoni' nene nanitekumu' ve. O'moso'mo line' gamazi ne'mosi ido' laza isaa' neve lo O'mosola lune' ne'mosi a'mine noso' nite' nene do lamine' oga' neinako nemu' nene luve.

*Izesu' Kilisito' Gonolo' Ve Lamine' Mineline'  
Monovomu' Paulo' Timoteo'ni Gala Do Lo-dine'  
Gamazi*

<sup>6</sup> Gaza lo-giduvoni' gamazi mene leze zuho Izesu' evenele lo-ngedeline' nene mono' gamazi lamine' apize gimunido' e'meto minaine' ne'mo nene luka'mi noso' nite' lolo' ogo hize ele' o-gidivo mino mo Izesu' Kilisito' gonolo' ve gihile lamine' nene minelesane. <sup>7</sup> Monoku' vo damine' gamazi heluno ne'mine gihile've nomine' getipe gamazi laa' nani' nene mehenga emaa' ozo. Ne'mine oga' noogosa monoto' monovo do hehe lovo' ogo molo iliningumu' nene ele'vole' ogo a'mine'mi gono've do ningel' ningel' ogo doka' doka' o'mo vo minezo. <sup>8</sup> Ne'mine noluvoni' nene nemu' noluve. Laza okode amuzo molo ele'vole' ogo minelive lo ne'mi gono've doka' doka' o'mo vo eksesais ogo minaa' noune' ne'mo nene ngomo hize ele' o-ledaa' neive. Ne'mine

oga' neiha monoto' monovo do hehe lovo' ogo amuzo molo ogo molo oga' ne'mo nene idise minevo' alevo' ogo nounidaa mene hize ele' o-ledelido' o neivosa ido' alinge' Okulumokuko minevo' minevo' ogo minelonidaasi nene hize ele' o-ledelido' o neive. Nemu' nene okode losuvomu' olone' inite' nene ivile' ivosa a'mine monoto' monovo do hehe lovo' oga' ne'mo nene mudise hize ele' gehepeve o-leddaa' neine' nenako nemu' nene noluve. <sup>9</sup> Ido' gamazi meve nene gihile lamine' neine' nenako mo mudise gele dalonido' nene lisihe' o neive. <sup>10</sup> Nemu' nene minevo' minevo' oga' neine' O'moso aza evene' muki' do ngu' izaato' minidot'i nene ado' leli' Kilisito'nimu' gele ele'vole' oga' nounive nene do lu' izaa' ive gehepeve ne neive losa ezemu' gele mu'musi' ogo none' nenako a'nemu' nene zege' zege' goloso ogosa mulumo gono ne'mine do do dizo minaa' noune.

<sup>11</sup> A'mine lo-giduvoni' gamazi muki' mene lo soto' ogo apize ngemezo. <sup>12</sup> Ido' gaza ve goso've ve li geikumu' gili kevo lemo minaaline. Nemu' nene Kilisito'nimu' gili ele'vole' igi minave nene gei' monovokalo' e'metilizado' lisihe' ilido' ogo molo ozo. Gaza gamazi liliningu' nolihe ne'mine mana'mine inite' iliningu' nolihe evene' lute ngemaa' monovolokisi ido' Guvelesi vemu' gele ele'vole' oga' monovolokisi ido' monovo goloso hamokisi ogo molo amo minaa' monovolokisi nene gaza lamino e'meto nanivo ne'mo nene ingine a'mido' e'meti igi mili ilizani' aka'ine nene ngelebizelive. <sup>13</sup> Naza gei' nanida olihe amuvo nanido' nene mono' godolou' gamazi nene gate

ngemaa' ido' lu'ine do oto ga'ine daa' gamazi longemaa' ido' mono' monovo apize ngemaa' gono ne'mido' nene luka amuzo molo molo minoosa do do vo minezo. <sup>14</sup> Ido' O'moso'mi veleti' gamazi geikumu' line' nene nilavo ido' mono' gizebo ve nene gonou' gele'mizi mili a'nine godokalo' nimilavo gonou' amuzo O'moso'mo lehize-gidine' nesi nene damanivo haza minaalive. <sup>15</sup> Mono' gonoka do lamine' o'mo novaine' nene evene' muki' ningilizangumu' ve lo a'mine lo-giduvoni' initeto' mene luka molo mino a'mine ne'mine monovo ogatokovo' nene minezo. <sup>16</sup> Gei' monovokalokisi ido' evene' apize ngeme ngeme' iline' gamazilokisi nene ninge lamine' gehepeve o minezo. Gaza a'mine gamazilo' nene mo gi'mize gili' lo mineline' ne'mo nene gasika lukuvo nalinido' gele'mize molosa gei' gamazika gililizavesi nene lukuvo nalizado' ngele'mize molalosainaze. A'mine gamazilo' nene gi'mize gili' lo minezo.

## 5

*Mono' Aleve Muki' Ogo Molo O-ngedaa' Iline'  
Monovomu' Paulo' Lo-imine' Gamazi*

<sup>1</sup> Gaza vemoho' ozoho ne'mine nene gamazi amuzonga lo-emamo gei' maho gehepeve gele neivosa gala do gamazi lo-emezo. Ido' izipe goso've nene nakuna gehepeve ne'mine gili minavosa ga'ine do gamazi lo-ngemezo. <sup>2</sup> Ido' vene' ozoho neve nene gei' izamote gehepeve gili nizavo ido' vene' alu ne'mine nene gaka do zovo' zava' izational. Aluna gehepeve gili nizavosa nene ga'ine do gamazi lo-ngemezo.

*Mono' Mulise Nete Noso' Nite' nGimi Hize Ele'  
I-ngidilizado' Lisihe' I Minilizani' Vene' Gevonoliti  
Monovomu' Timoteo'ni Lo-dine'*

<sup>3</sup> Vene' gevono' mamu' ninganivo mono' mulise nete hize ele' i-ngidilizado' minikeve lo ningeline' nene mo guhalihali gehepeve i minani' venekumukovo' nene ningelesane. <sup>4</sup> Ne neiha vene' gevono' maliti izipaha'ine nehe nga'vopilemo' nehe ma minilizani' a'mine aleve nene initel' ato' ma amisa gomu' ilizani' initel' naba ado' mono' ne'mo ize'ningine me'ninginemu' ne'mine monovo ilizave lo neine' nene ningi gili a'mido' e'meti'mi vi engi' zuho gehepeve engi' ize'ningine me'ningine golo hizi-ngidi noso' nite' nevo'mine ngimi hize ele' i-ngidilizave. Ee, ne'mine ogakumu' nene O'moso'mo lamine' gelaa' neine' nenako nemu' nene izipaha'ine ingine a'mine ize'ningine gizebo i-ngidilizave. <sup>5</sup> Vene' gevono' guhalihali gehepeve ogo minaa' neine' ne'mo nene O'mosolo' gele mu'musi' o mino holuka' nehe holise' nehe gamene gamene hize ele' o-delingu'mu' nene O'mosola lo minaa' neive. <sup>6</sup> Ne'mine ogo minaa' neiha vene' gevono' ma oko'no losuvo'mo lanite' giline' initekumukovo' gelo monaa' ine' vene' nene mo velesi ha noliha lulo've nene mo hele osu' lo vine' ne neive. <sup>7</sup> Mene nolo-giduvoni' gamazi nene ma avuto' ikevo evenelite ngelemikelizaze. A'mine lo-giduvoni' gamazi meve nene lo-ngemezo. <sup>8</sup> Ve ma ingine engi' zuho di guni gizebo i-ngidami minilizave muki' nene monovo goloso igi mono' huli osu' lisa Kilisito'nimu' gili ele'vole' amave

nene ngivile' igi lihime daa' ave minilisave. Ne neiha ve ma engi' numu'ningu' ingaa' ave engi' zuho gehepeve di guni i-ngidami minilizave engi' neve nene engi' zuho gizebo i-ngidamaa' ave linge masi nene ngivile' igi lihime nene naba goloso gehepeve daa' ilisave.

<sup>9</sup> Ido' mono' muliselite hize ele' i-ngidilizado' lisihе' i minani' vene' gonoliti gulive'ine gizelo ma nene kilisimasi fifti naeni (59) ivile' o no-line' vene' vanahine hamoto' bizo minine' vene' <sup>10</sup> ado' evene' hize ele' o-ngedaa' gono lamine' ado' izipe do naba o-ngedaa' ine' nolihe ido' venenga ve ani' nasahili' o-ngedaa' ine' nolihe ido' eze oko'no do lemo mino gelekele' vene' ne'mine gelo O'moso'mi evenele hize ele' o-ngedaa' gono daa' ine' nolihe ido' geni initeli'mi lulou' minave hize ele' o-ngedaa' ine' nolihe ne'mine mana'mine gono lamineto' e'meto daa' ine' vene' lamine' noline' neevo' nene gulive'ine gizezo. <sup>11</sup> Ne neiha vene' gevono' olihe ozoho milami gosoho' gidini nizani' neti gulive'ine nene gizamozo. Nene nanitekumu' ve. Alinge' nene lu'ine Kilisitodokovo' mili minani' ma nene oko'ine losuvo'mo lanite' giline' initekumu' otavosa velo' gohi volone li amuzo mili gililizani' nenako nemu' nene gulive'ine gizamolosane. <sup>12</sup> Ingine gohi velo' ma vilizani' nene gana' lu'ine Kilisitodokovo' molo minelone lani' ma nene avuto' igisa lihime dalisave. <sup>13</sup> Ido' ma nene gono dami haza gopo minaa' monovo ningi diti' igi mini numuno mukiku' dizaa' limaa' igi moniivo' minaa' nave. Ne'mine niigisa gamazi lodonga hize eza ema igi gamazi di lulu izi evene'

initekumu' dede' izi lamilizani' gamazisi nene li'mi monaa' nave. <sup>14</sup> Nemu' nene monoteli'mi biluva' ve nete ngemenga likelizave lo naza vene' gosoho' gevono' minani' nene velo' gohi vi izipe gidi mili numu'ine ebe'nido' nene gizebo igi minilizave losa noluve. <sup>15</sup> Ne'mine noluvoni' nene nanitekumu' ve. Vene' gevono' linge nene mo monokuti' limi vi Satani e'meti nivani' ne-nako nemu' nene noluve. <sup>16</sup> Ido' Kilisito' evenele mal'i'mi zuhou' nene vene' gevono' ma nizavo ma engi' hize ele' o-ngedaa' gono nene mono' mulise gehe-ngedamo asi've nene hize ele' o-ngedo vise' ani' init'e' ngemo minelive. Ne nanitekumu' ve. Mono' mulise ne'mo nene guhalihali igi minaa' naani' vene' gevono' nene hize ele' o-ngedaa' neine' nenako hize ele' i-ngidilizani' init'e' vise' ikelizave losa nemu' nene a'mine engi' zuho asi've hize ele' o-ngedelive lo noluve.

*Mono' Gizebo Ve Meni nGema'a' Ido' Goni'  
O-ngedaa' Ido' Mono' Gonolo' nGele'mize Mo-  
laakumu' Timoteo<sup>1</sup>ni Lo-dine' Gamazi*

<sup>17</sup> Ido' mono' gizebo ve linge gono lamine' di minaa' nave nene meni'nido' masi imine' mili ngimilizado' lisihe' o neize. Ne'mine igi ngimilo. Ne'mine noluvoni' nene mono' gono lamine' daa' ave mukito' nene vo do neiha mono' gamazi li soto' iga' naavelokisi ido' mono' monovo apizi ngimaa' naavelokisi nene vo do gehepeve o neive.

<sup>18</sup> A'mine noluvoni' gamazi meemu' neve nene mono' godolou' ti' lo lo neine' ma mo gele none' ma neive:

Bulumakatinelite lengi' viti gihiletine nene lisi di ledi' ledi' nii-lingidavo ma nene a'minguti' nevo ha nalizado' o neize.

Ma nikelizave li ve'nido' nene inite' ma di tili-  
ngidamilo.

Ido' ma neve nene:

Gonou' ve ingine gono'nidot'i meni'ine dalizado'  
lisihe' o neine' nenako  
mo meni'ine dalisave.

<sup>19</sup> Ido' evene' mali'mo mono' gizebo ve mamu'  
monovo goloso dave lo goni' o-delesa ma no-  
livo ma nene a'mine monovo goloso do no-  
line' nemu' nene evene' sitape setohamo he  
ne'minete mo ne'mine ogave li hamo' gamazivo'  
gehepeve lamavo ma nene alamo goni' o-  
damolosane. <sup>20</sup> Ido' lihime di'mi nave nene  
evene' mukiliti ve'nido' nene ngelemezo. Ee,  
evene' linge nesi nene nemu' golise gili li-  
hime dami hazavo' minilizangisi evene' mukiliti  
ve'nido' nene ngelemezo. <sup>21</sup> Gaza lo-giduvoni'  
gamazi mene e'mete gehepeve iline losa naza  
O'moso'mi velelokisi Izesu' Kilisito' velelokisi  
ido' O'moso'mo do kegese-ngidine' angelo'veti  
ve'nidokisi nene nolo-giduze. Goni' gamazi'ine  
olihe gele-ngedamo bubu izo mo lamineto' li-  
hime dikeve ido' damave lo mo lamo ido' go-  
niku' sisitemi nesi nene mo amo goni' neve  
nene mo monovo lisihetokovo' do molo gele-  
ngedelesane. <sup>22</sup> Ido' gaza evene' ma do kegeso  
mono' gizebo ve lolol' o-ngedelo ma nene bubu  
izo anga godo'nido' hito do kegese-ngedamozo.  
Gaza bubu izo ingine monovo'ine golososi ma  
nolingumu' ne'mine organivo engi' lihime nene  
geita dizalize. Lihimeka nomine' mineliningisi  
gei' monovokalo' nene gizebo lamine' ogosa  
minezo. <sup>23</sup> Ne'mine ogo minelesaine'za gaza  
haza nosovo' nonaine' nene hulo haza nosovo'

namo gatungau' initel' gete' geto gize do' gize do'  
 oga' naine' nene do lamine' o-gedelingisi vaini  
 noso ngomo ha nite' nesi malasini ne'mino noka'  
 noka' olosane. <sup>24</sup> Ido' gaza bubu izamozo nolu-  
 voni' nene nanitekumu' luvoba asi evene' malite  
 monovo goloso di lihime daa' naani' ne'mi guvele  
 nene geto buu lo vavosa alinge' gonito' ngele'mizi  
 milii lihime ngimaa' naani'za ve ma neve nene  
 monovo goloso di lihime daa' nani' ne'mi lihime  
 geto soto' amivo mino alinge' soto' oga' neive.  
<sup>25</sup> Ido' a'mine'mine ogo evene' malite monovo  
 lamine' igi mili iga' nani' nene mo sotokovo'  
 minaa' neive. Ido' malite monovo lamine' igi mili  
 iga' nani' nene idise soto' amo noline' nesi nene  
 ngelo mudise halekamoloseinako nemu' nene  
 bubu izamaa' iline losa nolo-giduve.

## 6

*Gelekele' Gono Daa' Ave Ingue Gizebo Ve'ine  
 Igi Mili I-ngidilizani' Monovomu' Paulo' Timo-  
 teo<sup>1</sup>ni Lo-dine' Gamazi*

<sup>1</sup> Evenel' malitesi nene O'moso'mi gulive di'mi  
 limi apize lengemaa' noune' monote nesi nene  
 divi ledivi' ikelizaze. Evenel' malite gelekele' gono  
 gihi-ngidikevo engi' gonou' initel'ine ne'mine  
 lili' i minave muki' ingine a'mine gelekele'  
 gono gihi-ngidaa' avemu' nene gilunivo diciivo'  
 minilizado' o neive li gili gelekele' lamine' i-  
 ngidivo' minilisave. <sup>2</sup> Ido' ve ma gono gihi-  
 ngidaa' ave gizebo ve'ine nene gili ele'vole' ave  
 nilizani' nene engito' gono daa' ave nete nene  
 a'mine gizebo vete nene Izesu' evenele leze zuho  
 neive li gilisa engikumu' gilavo lemavosa gonou'

nene alaha' alaha' igi dikelizave. Asi leli' gono dunidi'mo hize ele' o-ngidive nene Izesu' evenele leli' zuho lute ngimunive nene nizave lisa gono engito' dalizani' nene gohi ma amuzo milisa di mini gelekele' lamine' gehepeve i-ngidilizave.

*Ato' Mono' Apizi nGimaa' Aveti Monovomukisi Ido' Monototi' Heneni Ve Lili' Ilisa Gilaveti Monovomukisi Timoteo<sup>1</sup>hi Lo-imine' Gamazi*

Mene noluvoni' gamazi nene e'metilizave lo ga'ine do apize ngemezo. <sup>3</sup> Evene' malite mono' gihile lamine' Guvetesi ve Izesu' Kilisito' gamazi mono' monovo lisiheto' lele'mize molaa' neido' nene lu'ine milami gamazi ato' apizi ngimilizani' nene <sup>4</sup> engi' oko'ine di dizi otohato ve none li gila' na ha inite' hamokumukisi ma gili lamine' amavete nene laa' nave. Mono' monovomu' nene gamazidunu' ge hulo ne hulo laakumu' nene naba goloso ngisaa' neine'za ne'mine oga' ne'mo nene inite' ne'mino do soto' oga' neive: Mumuzo' ogo goloso gelaa' lovo lolize oga' ido' dovo ledevo' gamazi laa' hazamu' ngemenga laa' ga'ine gila'  
<sup>5</sup> eze elemivo eze elemivo laa' ne'mine monovo nene do soto' neive. A'mine ne'mine monovo ne'mini di soto' iga' ave neti madu'ine nene goloso ogavo mini gamazi gihile nene damavo engita nomivo mini inite' gohi gohi dalone' aka nene mono' monovolo' e'metaa' nehe li gila' nave. <sup>6</sup> Ido' lamine' inite' gohi gohi dalone' aka nene neine'za ingine giladi'mine ogo me misubou' inite' nevoba asi laza do none' inite' nene leli' votigilelo' mo vo do neive lo hongu lo lamino minosa mono' monovolo' e'metaa' noune' ne'mo luteli'mi heneni nene vai' goloso do soto' o-ledaa'

neive. <sup>7</sup> Ne'mine noluvoni' nene nanitekumu' ve. Laza izetehi mulunouti' soto' uningu' nene inite' hamokisi do amosa me misubo hulo volonidaa nene inite' hamokisi ma do vamolosune. <sup>8</sup> Nemu' nene noso' nitekisi okodelo' nitekisi do minelone' nene leli' votigilelo' mo vo do neive lo hongu lo lamino minelone. <sup>9</sup> Ne neiha ingine heneni ve lolo' olone li gilaa' ave nene Satani'mo nge-mengu' molo ngimimise' ogavo negi hizi do goloso o-ngedaa' neine' inite' mukikumu' nene ma dunivo li gilaa' nani' ne'mo nene vi Satani'mi gelevusou' bilaa' nave. Ee, evene' di goloso i-ngidi ngele'mize tolovo iga' nani' initekumu' nene ngumo helavo monokuti' limi ingi goloso iga' nave. <sup>10</sup> Ne'mine noluvoni' nene lute monilo' molaa' ne'mo nene ne'mine mana'mine monovo goloso nene do soto' oga' neive. Evene' ma nene moni heneni dalisa gili mono' akaloti' vi gopo igi engi' oko'nido' nene mulumo geni inite' vai' angise'ine di gihaa' nanako nemu' nene noluve.

*Timoteo'ni O'moso'mo Imine' Gono Nene Amuzo Molo Do Mineline' Monovomukisi Ido' Heneni Vete Igi Mili Ilizani' Monovomukisi Paulo' Gala Do Lo-imine' Gamazi*

<sup>11</sup> Ne'mine iga' nani'za O'moso'mi gonolo' ve gaza me luvoni' monovo golosolot'i nene golise ogo mehenga emo mene lo-gemeloni' monovo nene imiselo dalosa amuzo molozo. Ado' monovo lisihekovo' ogakisi mono' monovolo' e'metaakisi Guvelesi vemu' gele ele'vole' ogakisi lute ngemaa' monovo nesi ido' geni inite' soto' ilingu' zege' zege' ogakisi hongu monovo evene' ngelebizo minaakisi nene dalinge. Imiselezo. <sup>12</sup> Evene' malite meni dalisa ge hulo ne hulo

li loti' izi vaa' nani' ne'mino gaza mono' lesisi lamineku' nene zege' zege' ogo loti' izo minevo' minevo' gemeni dameni nene do ti' ozo. Ado' ne'mine iline lo O'moso'mo elese molo-gedavo ogo evene' mukiliti ve'nido' do lamine' ogo Kilisito'nimu' gele ele'vole' oga' naningumu' nene lo soto' aine' ma neive. <sup>13</sup> Ido' O'moso inite' muki' vetesi minaa' amuzo limive'mi velelokisi ido' ngamani naba Podio' Pilato' minidaa gamazi gihile lamine' lo soto' ive Izesu' Kilisito' velelokisi nene ti' lo nolo-giduze: <sup>14</sup> Gaza mono' gamazi lo-giduvoni' nene e'mete gehepeve ozo. Ne'mino gaza a'mine gamazi nene do gopo amanivo evene' nene ningi a'mine gamazimu' nene ningedo' hangedoka lamavo Guvetesi ve Izesu' Kilisito' soto' ilido' nene lihimeka nomine' minelesane lo nolo-giduve. <sup>15</sup> Ido' a'mine Guvetesi ve nene O'moso asi've molani' gamenelo' gehepeve nene do soto' o-deleseive. A'mine O'moso nene laminekukovo' minive dizo minine' gizebo ve hamo' minive guve'inesi naba mukiliti Guve'inesi ve naba minive <sup>16</sup> ei' hamokovo' nene helamaa' ive ado' evene' hamolitesi ngelo avitasi vamolone' o minine' labanali'mi lulou' minive evene' hamolitesi ningamani' mino mo ngeli ningamilizani' O'moso eikumu' nene gilunivo dizo minavo gizebo o-ledeline' amuzo've nene ele'vole' ogo minevo' minevo' ilive. Mo ne'mino minilihoo.

<sup>17</sup> Ido' gaza idise mene gamenelo' moni heneni ve nizave nene ga'ine do lo-ngedezo. Angise'inemu' gilavoo dizi minisa a'mine do ngululubize-ledaa' neine' inite' moni henenilo' nene gili mu'musi' igi gili medeli minami asi

lanite' gili minilizave lo inite' mata' muki' vauve elo lehize-ledaa' ive O'moso eikumu' neve nene gili mu'musi' igi gili medeli mini <sup>18</sup> gono lamine' di nizavo heneni'ine nene a'mine gono lamine' ne'mo nene lolo' ogavosa a'mine nene vauve ili dii mini engita minine' inite' nene inele panala igi evene' masi nasahili' i-ngidi minilo lo lo-ngedezo. <sup>19</sup> Ne'mine ilizani' nene alinge' gameneu' mine lamine' ilizangumu' hize ele' o-ngedeline' heneni'ine nene di milisa a'mine gameneu' inite' gihile minevo' minevo' ngemeni dameni nene dalizado' minilisave.

*Timoteo'ni Gala Do Paulo' Luhuovo Nite' Gize Osu' Lo Gizine' Gamazi*

<sup>20</sup> Timoteoo, gaza O'moso'mo do-nedeline lo gono gimine' malo' nene gizebo lekeseve ozo. Ido' haza mono' gihile nomine' gamazi evene' malite laa' nani' nesi ido' soza li gele veveraa' monovolo' noe'metune li mono' gamazite bili laa' nani' gamazi nesi nene gelamo mehenga emaa' ozo. <sup>21</sup> Ne'mine oga' ozo noluvoni' nene evene' ma nene a'mine ne'mine gamazilo' vi gi'mizani' ne'mo mono' gihileloti' nene mo zovo' izi vikeve.

O'moso'mi nasahili' nene lengikisi miniliho.

**MONO' GODOLO GOSOHO'  
The New Testament in the Dano (Upper Asaro)  
language of Papua New Guinea  
Nupela Testamen long tokples Dano (Upper Asaro)  
long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 11 Nov 2022 from source files dated 9 Oct 2020

76c78bc1-63e6-5f61-a363-169051cf72e